

殺

學

辨

正

中華民國九年冬月補刻

醫學辨正

紹興醫藥學報社發行

版藏紹
興裘氏

序

張子和儒門事親云，爲人子者，不可不知醫。余早歲從戎，無暇習學。丙寅乞假南歸，老母多病，日事藥爐，留心醫道，覺傷寒金匱及劉朱張李諸子之法未盡善，得靈樞素問而讀之，始知醫具五行生尅之義，陰陽消長之機，非諸家一偏之見所可比。然頭緒分繁，未得要領，不敢輕易治病，以人命爲嘗試。及悟得脈之陰陽，藏於上下內外來去六字之中，從此豁然貫通。三十餘年以來，所治之症，雖不能盡保萬全，而錯者

亦稀。范文正公云：不爲良相，則爲良醫。以良相可以救人，良醫亦可救人也。然救之於一時，不如救之於萬世。是又貴乎立言，以垂久遠。於是著醫論二十八篇，上以明軒岐之蘊奧，下以發後人之誤解。復以本草有訛錯，取各藥逐味而嘗之。選常用者一百六十種，分陰陽五味，列於十二經脈之後，使人知所趨向。至於方劑，遵內經熱淫於內，治以辛涼，佐以苦甘之法，最爲簡便。本可無須立方，或曰：內經以無方而失傳，予不立方，後人亦必束諸高閣，焉能濟世。因而又選古人之

經驗良方，列於各症之下，不知醫者，按症查方，亦可愈病，惟
內中見解，多半與前賢相左，故名之曰醫學辨正。予豈好辨
哉，予不得已也。

光緒丙申仲春山陰張學醇筱溥書於退補草堂

醫學辨正卷一目錄

望聞問切失傳論

診脉部位錯亂論

浮沉遲數分藏府不分寒熱論

脉有陰陽論

男女陰陽論

小兒陰陽論

南北陰陽論

四時陰陽論

男女異脉論

人迎寸口分寒熱論

脉持大綱論

天地人三才論

三部九候論

十二經各有陰陽論

寒熱真假論

虛實卽寒熱論

五藏各有寒熱論

萬病皆須分寒熱論

藥治風寒暑濕不能治七情論

藥可治病不可常服論

診脉論

望問論

張仲景傷寒論

華陀中藏經論

庸醫殺人論

本草論

分寒熱用藥論

决生死論

醫學辨正卷一

山陰張學醇男校訂

望聞問切失傳論

靈樞素問乃黃帝與其臣岐伯互相問答之詞明五行生剋之理發陰陽消長之機望聞問切四法皆備為醫學之祖五百年來無能得其蘊奧劉朱張李為醫門之四大家自云極一生之力不能參透後學因此畏難而不讀今日學醫之士無不取湯頭歌訣而讀之以之治病得失無定再則因病而

醫學從傷寒金匱入手，尊仲景爲聖人，自以爲已超絕頂，然皆見症施治，仍無準繩，欲求萬全，須問途於靈素，而靈素所重者，望聞問切，望非明目者不能察，後人因目力不及，望之不准，不甚推求，惟切脉則學醫者人人習之，而又爲昔賢解錯，以訛傳訛，亦不過徒存其名，聞則更無把握，世上所行者，惟問之一法，細揣經文，古之所謂問者，問寒熱之內外，以知藏府之虛實，今之所謂問者，混而言之曰：惡寒發熱，不問內外虛實，是問亦失傳矣。余自得訣以來，治病頭頭是道，而與

親友中之明醫者言則鮮能領悟細心體察診法之無準一
由於醫者手指之皮厚一由於病人肌膚之皮厚太素脉云
至數分明謂之清至數模糊謂之濁質清脉清者富貴質濁
脉濁者貧賤此病人之分別也至於醫者或由於生來之皮
厚或在火上燒鴉片煙而皮厚此等人診脉皆無準經云明
目者可以視色聰耳者可以聽音捷疾辭語者可使傳論語
徐而安靜手巧而心審諦者可使行鍼艾理血氣而調諸逆
順察陰陽而兼諸方得其人乃言非其人不傳也傳道之難

自古如是，今四法俱失，醫道更難言矣。

診脉部位錯亂論

診脉部位大小二腸經無明文，惟素問五藏生成篇云：咳嗽上氣，厥在胸中，過在手陽明太陰，心煩頭痛，病在隔中，過在手巨陽少陰，靈樞經脉篇云：手太陰肺脉起於中焦，下絡大腸，手少陰心脉起於心中，下膈絡小腸，脉絡既聯，則診脉應在同部，雖不言部位，而部位在其中。秦越人取肺與大腸，心與小腸，相表裏之義，而配大小二腸於兩寸，乃遵內經之旨。

也。李蘋湖非之，以心肺在上，焦如水中之蓮花，大小腸在下，焦如水中之汙泥，豈可相提並論？以小腸配於左尺，大腸配於右尺，張景岳以小腸屬火，火居火位，應當診於右尺，大腸屬金，金水相從，應當診於左尺，各執己見，令人無所適從。余自得訣以來，察看病症，大小二腸實在兩寸，當以越人之說爲是。張李之見爲非，醫之一道，關人生死，如確有所見，試之於病，萬舉萬當，雖經文亦可易，否則萬不可隨意立論，以啟後人之疑。靈素至今五千餘年，魯魚之訛，勢所不免。王太僕

素問序內已云正謬誤者六千餘字所正者豈能盡合經旨如素問脉要精微論云濇者陽氣有餘也滑者陰氣有餘也而靈樞又云滑爲陽氣盛微有熱濇爲陰血盛微有寒彼此相反何所適從當思滑爲流動之象豈是陰氣有餘之理此乃素問之訛錯當從靈樞爲是其餘彼此不符之處甚多吾故曰確有所見雖經文可易也

浮沉遲數分藏府不分寒熱論

數熱遲寒之論出之難經二千年來舉世宗之以之診病則

有驗有不驗。靈樞邪氣藏府病形篇云：脉有緩急、大小、滑濇、以分寒熱。所謂諸急多寒、緩者多熱、大者多氣、少血、小者氣血皆少、滑者陽氣盛、微有熱、濇者多血、少氣、微有寒。細揣經文諸急多寒、緩者多熱二語，既言多字，則非純寒純熱可知。遲與緩相同、數與急相同，指下頗難分別，惟分內外，則寒熱易見。以遲數分寒熱，難免錯誤。至於經文原有數爲陽、遲爲陰、浮爲陽、沉爲陰之論，所謂陰陽者，指藏府而言也。難經原文亦云：數者府也，遲者藏也。下文又云：數則爲熱，遲則爲寒。